

周易本義爻微

周易本義爻徵序

講學家喜談易而競辯者好論史茲二者皆有弊以空言  
釋易初學聽而茫然不知其爲何事也事莫備于史讀史  
者又往往持三寸之管騁其巧言偏辭以臧否古人其究  
也將游于遙蕩恣睢而靡所止此博辯之徒非性命之正  
也甲午春德僑寓青門謁同門張玉谿山長出吳徵仲先  
生周易本義爻徵以示先生爲吳蔗鄉師高叔祖嘗講易  
石林著有易義集粹及周易本義翼海內學者仰如山斗  
又輯爲爻徵二卷取上下數千年事合之三百八十四爻  
約而精微而顯信而有徵俾學者觸類引伸凡得之漁獵

者一一可會之于易德受而讀之竊歎曰先輩務學一至此乎此非獨邃于易蓋精于史也今而後知讀史之法不越乎讀易矣不特此也史書所傳者古人之言行耳吉凶悔吝生乎動動而善則爲吉動而不善則爲凶爲悔爲吝我觀之古古人一言一行動而入于吉凶悔吝者史也卽易也我觀之今今人一言一行動而入于吉凶悔吝者卽史也亦卽易也我觀之我凡我之一言一行動而入于吉凶悔吝者亦無非史也無非易也是書雖止二卷而易道明史事通行身應物之方亦于是乎該且徧不必乞靈著蔡而是非得失瞭焉如指諸掌是書之隔我後學也豈塞

淺哉德齒已長矣久嬰痼疾屏處窮閭于人世榮利一無所營吉固不敢趨凶亦不敢蹈所不能免者悔吝耳願受一編置之座右佩服在躬永永無斁道光甲午春二月既望後學整厓路德謹序

德旣作弁言師以書投曾淳將付梓曾淳病歿明年師卒於興安郡署德徧求是書不得使福先索之不得後以語及門汪子汪子指篋曰藏此中久矣開扃鐫而出之蓋曾淳病革時以書投汪子曰吾子幼恐不免散失子爲我貯之以待知者德獲是書示孟熙中翰中翰方刊惜陰軒叢書喜曰吾書中正須此種急鳩工刻之計

是書之作經百數十年未有刊本今始壽之棗梨以公  
海內顯晦信有時與然非曾淳善託汪子慎守則是書  
亦廣陵散矣師諱鳴捷嘉慶辛酉進士知鄜州攝興安  
守長子曾淳字亞農著有畫苑集成十二卷今亦存汪  
子處福先曾淳子汪子名規字朶雲師表姪休甯人今  
家長安庚子冬十二月路德識

序

嘗聞道之不可須臾離也爲其無物不有無時不然大極於無外細入於無閒也是以聖哲迭興作爲禮樂政刑詩書六藝不過欲使天下後世講明遵守以不失此道焉爾然在六經能彌綸兼至者莫如易以言乎遠則不禦以言乎邇則靜而正以言乎天地之閒則備矣故聖人窮理盡性極深研幾以至開物成務通志斷疑恆必用之蓋卦爻旣設而天下之道冒焉微通夫性命鬼神顯該夫綱常日用故自天子至於庶人聖賢至於愚不肖莫不在處可施隨用各足是以讀者又不可拘方執體本絜靜精微之理

爲廣大變通之用斯則深於易者乎粵觀程子易傳旣明  
且實矣朱子復作本義乃以象包衆理占應庶務而不泥  
於一人一事者以爲易之道本如是也說在予之本義翼  
矣若乃爻徵之輯則以程二交予姪諮臣也二交諮臣有  
用世之志嘗欲因經會史癸亥之夏從予石林講易以是  
爲請予未之應也甲子春又亟言之旣而思曰夫易固不  
可以一端盡然時有消長之不齊位有當否之或異聖人  
觀會通以行典禮而道之變動著於六爻若徵之往蹟則  
尤顯而易見殆亦窮經致用之方也於是擬議象辭參考  
載籍取其事理相符者輯爲此書凡先儒已言者十之三

今所採錄者十之七踰月告成於是不待窮深極微而善  
可爲法惡可爲戒者已昭然於心目矣豈非學易寡過之  
一助乎若夫引伸觸類神明默成則存乎其人固非爻微  
之所能盡也因書首簡以告觀者

康熙甲子三月新安吳曰慎序



序

吾伯微仲先生寢食周易五十餘年所有易義集粹已梓行海內當世大儒君子咸欽重之惟所著周易本義翼畢生精力萃焉因卷帙繁多未及刊行周易折衷內已採列數十條至於爻徵一書乃與程兄二交長兄諮臣曩年講易石林所輯也吾伯嘗曰論事不綜於理則流爲刑名法術之學論理不徵諸事則入於空虛寂滅之談兩者交譏故旣默會性命精微之蘊復上下古今得失以證吉凶悔吝消長存亡之道俾讀經者知以經會史而讀史者亦知以史證經庶幾體用一原顯微無間一生學識略達於此

因與吾弟煒訂而存之益知聖人謨訓明徵定保而窮經  
可致用也學者用舍窮達一動一言知以是爲法戒則此  
書可與朱子綱目並傳不朽引伸觸類而用之無窮矣姪  
昌謹識

周易本義爻徵目錄

卷上

上經

卷下

下經

高叔祖徵仲先生所著周易爻徵及就正齋語錄未梓  
身後遺藁散失徧索不得辛巳秋曾淳自咸陽歸歛過  
巖市鎮遊書肆于故紙堆中得其鈔本入秦呈家大人  
家大人喜曰吾求之四五十年乃今得之天幸也卽命  
付梓

曾淳

謹跋

周易本義爻徵卷上

歙吳曰慎微仲著

朱子云易如一箇鏡相似看甚物來都能照得自天子  
至於庶民都使得若會得卦爻本意卻不妨當此時居  
此位作此人也

三三

乾下  
乾上

乾元亨利貞

初九潛龍勿用

初九有潛龍之象是聖賢在下如舜之側陋伊尹耕莘  
呂尙釣渭說築傅巖顏居陋巷之類

九二見龍在田利見大人

見龍如伊傳周召得君行道天下之民咸被其澤也

九三君子終日乾乾夕惕若厲无咎

乾惕如周公思兼三王仰而思之夜以繼日幸而得之坐以待旦也○蒙引云晉周處膂力過人不修細行父老指其爲害處乃厲志好學卒爲晉名臣此可見過剛惕厲則无咎也

九四或躍在淵无咎

或躍如堯崩舜避堯之子舜崩禹避舜之子又如孔子仕止久速各當其可亦此爻隨時進退之義○程傳曰

舜之歷試時也

九五飛龍在天利見大人

飛龍如堯舜禹湯以聖人在天子之位者皆是○楊龜山曰此舜之謳歌朝覲時也

上九亢龍有悔

亢悔如堯舜之子皆不肖亦盛極而衰也堯命舜攝位舜命禹總師而卒禪之極則變變則通无悔之道也○伊尹復政厥辟周公復子明辟知進退存亡而不至於悔也蔡澤相秦數月而歸相印亦知此義用九見羣龍无首吉

人君剛而能柔則仁義並行恩威相濟得中之道也漢武則偏于剛漢元則一於柔失君道矣○朱子曰君道主剛而其動也用柔夫必遠好色必去小人必安社稷必服暴亂乾之剛也至於禮臣下恤百姓虛心取善舍己從人其動莫非柔矣

三三三  
坤下  
坤上

坤元亨利牝馬之貞君子有攸往先迷後得主利西南得朋東北喪朋安貞吉

初六履霜堅冰至

漢成帝始以王鳳爲大司馬大將軍綱目特書元舅所

以著新莽篡竊之漸也。○唐高宗立武氏爲皇后卒致革唐爲周之禍明皇用祿山爲大將終取失國幸蜀之羞其餘小人進而君子禍小不謹而敗大謀者皆此交之義也

六二直方大不習无不利

柔順中正不待思勉以臣道言文王至矣唐郭子儀亦庶幾乎

六三含章可貞或從王事无成有終

如伊尹樂道耕莘卒相湯以王天下孔明高臥隆中卒輔昭烈以繼漢統



六四括囊无咎无譽

如梅福知王莽必篡漢遂棄家變姓名而去逢萌懼禍將及掛冠而歸將家屬客於遼東○桓帝時姜肱獨居土室或目之爲狂生後乃免於黨錮之禍○靈帝時申屠蟠見范滂等非訐朝政公卿折節下之乃絕跡於梁碭之間自同傭人及滂等羅黨錮之禍惟蟠超然免於評論

六五黃裳元吉

在堯爲允恭克讓在舜爲溫恭允塞在文王爲徽柔懿恭

上六龍戰于野其血玄黃

如漢呂后臨朝誅殺劉氏子孫及絳侯誅諸呂男女無少長皆斬之。漢何進欲誅宦官爲張讓所殺袁紹捕得趙忠等及諸宦者皆殺之凡二千餘人讓後投河死。○如春秋書衛州吁弑其君完後衛人殺州吁于濮亦此象也此類不能悉舉。○以勢陽不敵陰以理陰不勝陽故俱傷

用六利永貞

坤變乾雖柔必強變化氣質者當如之。○臣道主柔而其動也用剛不敢倡始不敢爭先循分守安進退之類

坤之柔也至於犯言敢諫捐軀盡節託孤寄命正色立朝其動莫非剛矣

䷁ 震下  
坎上

屯元亨利貞勿用有攸往利建侯

初九磐桓利居貞利建侯

如孔孟周流列國欲行道濟時然孔子進以禮退以義得之不得曰有命孟子不枉己從人守不見諸侯之義是磐桓居貞也○不以尊貴自驕逸而屈己以恤人窮以理民事是以貴下賤得民而可君故利建侯如舜歷試諸艱而堯禪禹治水有功而舜禪禹

六二屯如遭如乘馬班如匪寇婚媾女子貞不字十年乃字

如人逼近於難遠有外應未敢遽進被近者所陵經久之後乃得相合非惟男女而已萬事皆象於此○竇融據隴西志從光武而隔於隗囂久然後得台彷彿此爻之義

六三卽鹿无虞惟入于林中君子幾不如舍往吝

隗囂公孫述皆非霸王之器又據偏安之地豪傑如馬援者又不之與乃欲與漢光武爭天下卒自取滅亡亦此爻之義也

六四乘馬班如求婚媾往吉无不利


己才不足以濟屯則求賢以自輔是其明也子陽井底蛙不知己也項羽有一范增而不能用不知人也可謂明乎

九五屯其膏小貞吉大貞凶

周室衰微桓文強霸有似於此

上六乘馬班如泣血漣如

柔居屯極進無必爲之才退有無益之泣朝夕必亡而已唐之僖昭是也



坎下  
艮上

蒙亨匪我求童蒙童蒙求我初筮告再三瀆瀆則不告利貞

初六發蒙利用刑人用說桎梏以往吝

書曰扑作教刑記曰夏楚二物收其威也書又曰敬敷五教在寬蓋寬以濟猛此爻之義也

九二包蒙吉納婦吉子克家

伊尹周公輔幼主施政教以致太平如此爻也

六三勿用取女見金夫不有躬无攸利

如谷永阿附王鳳揚雄爲莽大夫苟爽失身董卓凡貪利祿而從不正者皆見金夫不有躬者也

六四困蒙吝

朱呂榮公嘗言人生內無賢父兄外無嚴師友而能有成者少矣○周子曰人生而蒙長無師友則愚○凡不親賢取善而昏蔽終身者皆此爻之象詩曰不明爾德時無背無側爾德不明以無陪無卿


六五童蒙吉

如成王之於周公是也太甲亦近之○楊氏曰夫湯之於伊尹高宗之於傅說皆學焉而後臣之由斯道也

上九擊蒙不利爲寇利禦寇

蒙引曰擊蒙卽今之用鞭扑也爲寇是擊其課程不大

進而責效於旦夕者也故不利禦寇是擊其好頑要遊  
蕩以收其放心者也故利○程傳曰若舜之征有苗周  
公之誅三監禦寇也秦皇漢武窮兵誅罰爲寇也



乾下  
坎上

需有孚光亨貞吉利涉大川

初九需於郊利用恒无咎

如危邦不入亂邦不居天下無道則隱如伯夷辟紂居  
北海之濱以待天下之清也

九二需于沙小有言終吉

如定公初年孔子在魯不仕以季平子逐君陽貨作亂



故不輕進也

九三需于泥致寇至

如子路仕於衛輒卒死於孔悝之難是也

六四需于血出自穴

如子羔仕衛難作而出故孔子聞衛亂曰柴也其來由也其死矣○沛公見羽鴻門彷彿此爻之義

九五需于酒食貞吉

爲治者紀綱法度皆已備舉而雍容以待治功之成如夫子所謂必世而後仁是也○君子居易以俟命及必有事焉而勿正心勿忘勿助長亦此意也

上六入于穴有不速之客三人來敬之終吉

如沛公先入關項羽怒攻之項伯與張良善夜馳見良欲與俱去良邀項伯入見沛公沛公奉卮酒爲壽約爲婚姻遂因以謝項羽而得免於難此不速之客來敬之終吉者也



坎下  
乾上

訟有孚窒惕中吉終凶利見大人不利涉大川

初六不永所事小有言終吉

召南行露之篇男侵陵女女不從遂誣以有室家之約貞女乃訟之初六陰柔不永於訟然曰室家不足則初

六之辯明矣強暴之男則訟之九四也曰亦不汝從則  
九四不克訟矣貞女之志所以得伸者以有召伯聽訟  
之明爲九五之大人也

九二不克訟歸而逋其邑人三百戶无眚

如欲與在上者訟知勢不可敵而退處卑小以示屈服  
亦免禍之道也

六三食舊德貞厲終吉或從王事无成

六三陰柔才弱守舊居正不與人訟未免受人之侵故  
有厲然含忍不報畢竟是好故終吉

九四不克訟復卽命渝安貞吉

如虞芮之君相與爭田將朝文王而訟之見周之人無不相讓乃退以其所爭之田爲閒田是也

九五訟元吉

舜中正之大人也故天下訟獄者不之堯之子而之舜  
○召伯或芟甘棠之下以受民訟人不忍伐其樹則其中正可知矣○虞芮欲質成於文王以文王之中正也  
上九或錫之鞶帶終朝三褫之

衛元咺訟衛成公於晉衛侯不勝晉人執之歸於京師  
元咺歸立公子瑕後衛侯歸自京師殺元咺及公子瑕  
彷彿如此爻

䷁ 坎下  
坤上

師貞丈人吉无咎

初六師出以律否臧凶

夏王啓甘誓曰左不攻于左汝不恭命右不攻于右汝不恭命御非其馬之正汝不恭命用命賞于祖不用命戮于社○武王牧誓曰今日之事不愆于六步七步乃止齊焉不愆于四伐五伐六伐七伐乃止齊焉○魯公費誓曰馬牛其風臣妾逋逃勿敢越逐○司馬法坐作進退皆有常節無號令節制是失律也

九二在師中无咎王三錫命

如舜命禹征有苗仲康命胤侯征羲和周宣王命尹吉甫伐玁狁詩人美之曰文武吉甫方叔伐玁狁詩人美之曰方叔元老是剛中之將承天寵也

六三師或輿尸凶

不量勢力不敵而輕舉妄動以取敗如楚得臣與晉文戰於城濮而楚師敗績是也此類甚多

六四師左次无咎

如禹征苗而班師晉文遇楚而退舍是也使漢高不至白登唐太宗不渡鴨綠何咎之有


六五田有禽利執言无咎長子帥師弟子輿尸貞凶

敵加於已不得已而應之如蠻夷猾夏寇賊姦宄爲生  
民之害然後明其罪以討之禹征苗啓征有扈魯征徐  
戎高宗伐鬼方宣王伐玁狁是也若秦皇漢武皆窮山  
林以索禽獸非田有禽也○任將不專而致覆敗者如  
晉荀林父邲之戰唐郭子儀相州之敗是也○河曲之  
師趙盾爲將而令出於趙穿邲之師荀林父爲將而令  
出於先穀唐九節度之師不立統帥故皆敗也

上六大君有命開國承家小人勿用

朱子曰漢光武定天下之後一例論功行封其所以用  
之在左右者則鄧禹耿弇賈復數人他不與焉合於此

爻之義○此說與本義不同



坤下  
坎上

比吉原筮元永貞无咎不寧方來後夫凶

初六有孚比之无咎有孚盈缶終來有它吉

如孔子之於蘧伯玉是也

六二比之自內貞吉

如伊尹太公孔明懷才抱道不苟從人遇聖明之君致  
敬盡禮而後比之是貞吉也

六三比之匪人

比之匪人凡居者之鄰學者之友仕者之同僚皆所當



戒也○自學者言之則友便辟友善柔友便佞是也自仕者言之則爲入於不善之黨如范增之於項羽嚴尤之於王莽是皆可傷也

六四外比之貞吉

如禹皋稷契之事堯舜同心一德共成魏煥之業也

九五顯比王用三驅失前禽邑人不誡吉

此王道之大所以其民皞皞而莫知爲之者也王者如天不令人喜不令人怒其比天下之道光明正大如堯舜之治未嘗違道干譽取必期望而自於變時雍四方風動也○凡事上處友於鄉黨親戚惟誠意盡道以待

之親已與否在人而已不可逢迎苟合以求人之比已  
皆三驅失前禽之義也

上六比之元首凶

存疑曰漢之劉盆子是也○桀紂幽厲凡昏庸之主在  
上民心離散者皆是

三三

乾下  
巽上

小畜亨密雲不雨自我西郊

初九復自道何其咎吉

胡氏曰文王當紂之時左右憚人終不能自止其進也  
○如竇融隔於隗囂馬援隔於公孫述以其自守不從

其後卒得歸漢是二人不能阻乃復自道也○學者克已復禮不以人欲害其天德之剛復自道也

### 九二牽復吉

與其同志去邪歸正不屈折其生平如魏徵隨李密歸唐徵遺徐世勣書勸之早降世勣遂決計西向是世勣與魏徵牽連而復也○唐安祿山反常山太守顏杲卿力不能拒與長史袁履謙往迎之祿山賜以金紫杲卿歸途謂履謙曰何爲著此履謙悟乃與杲卿謀起兵討祿山是履謙與杲卿牽連而復也

### 九三輿說輻夫妻反目

如荀彧志在復漢往從曹操操欲篡漢而彧輔之不復去及阻董昭九錫之議操不悅彧因飲藥自殺是說輻反目之象也

六四有孚血去惕出无咎

此爻是以寡畜衆以弱畜強如燕昭王用樂毅之策連趙魏之師以伐齊劉先主用孔明之計結好孫權以抗曹操是也

九五有孚攣如富以其鄰

如齊桓晉文合諸侯以遏強楚是也

上九旣雨旣處尙德載婦貞厲月幾望君子征凶

如唐武后之勢既盛高宗俛首而受其制遼金之勢既成宋人帖耳稱臣與之連和季氏世執魯柄而國人不  
知有君君亦安於屈辱也

三三

兌下  
乾上

履虎尾不噬人亨

初九素履往无咎

君子素其位而行不願乎其外在下位不援上也○此  
爻是賢人始進不變塞也達不離道也如伊尹耕於有  
莘之野樂堯舜之道及應湯聘而起則欲使是君爲堯  
舜之君使是民爲堯舜之民可謂素履之君子矣

九二履道坦坦幽人貞吉

不得志獨行其道順理則裕故坦坦也如孔門顏曾諸賢是也

六三眇能視跛能履履虎尾噬人凶武人爲于大君

如唐文宗時李訓鄭注以誅宦官爲已任計不成反爲宦官仇士良所殺并殺大臣吏卒二千餘人訓注本小才而自以爲能故及於禍也○宋韓侂胄欲立功名以固權位首謀伐金以致金人內侵蜀口淮漢之民死者不可勝數公私之力大屈史彌遠奉寧宗密旨殺之此亦眇跛而履虎尾者也○秦政項籍無大君之德而自

恃其強故不能久亦上文取象之義也

九四履虎尾愬愬終吉


漢武帝時朝廷多事督責大臣自公孫弘後丞相比坐事死惟石慶以醇謹得終合於此爻○漢高帝殺戮功臣蕭何以善處得免亦是

九五夬履貞厲

如漢武帝雄才大略剛果有爲然興土木求神仙建封禪縱遊觀征四夷致海內虛耗百姓疲弊此夬履之厲也

上九視履考祥其旋元吉

所履既終則吉凶定而可考若十分善者方得元吉若  
一分善則一分吉一分不善則一分凶也○如五福六  
極之應在君則由於極之建不建在民則由於訓之行  
不行也○作善降之百祥作不善降之百殃○積善之  
家必有餘慶積不善之家必有餘殃○祥朕兆也視其  
所履而知其後來之吉凶如成肅公受脤不敬而劉康  
公知其不返魯邾二君執玉高卑其容俯仰而子貢知  
其將亡是也



乾下  
坤上

泰小往大來吉亨



初九拔茅茹以其彙征吉

唐虞之際八元八愷並登於朝周之興也四臣十亂同心同德時泰則羣賢並進也○宋仁宗慶歷以後君子盈朝亦此爻之象

九二包荒用馮河不遐遺朋亡得尙于中行

如伊傅周召是主泰而得中道者也書曰無忿疾於頑無求備於一夫是包荒也功崇惟志業廣惟勤惟克果斷乃罔後艱馮河也闢四門明四目達四聰不遐遺也官不及私昵惟其能又曰以公滅私朋亡也○詩曰不競不綏不剛不柔孟子曰武王不泄邇不忘遠皆此爻

之義也

九三无平不陂无往不復艱貞无咎勿恤其孚于食有福  
周道漸衰穆王命君牙有心之憂危若蹈虎尾涉于春  
冰之言命伯冏有怵惕惟厲中夜以興思免厥愆之言  
是艱貞无咎也其後巡遊無度卒以致亂不食福矣○  
漢至武帝海內虛耗宣帝勵精爲治漢業復光此艱貞  
食福也

六四翩翩不富以其鄰不戒以孚

如漢元帝時弘恭石顯靈帝時曹節王甫唐高宗時許  
敬宗李義府皆結黨陷害忠良此泰極而三陰下復也

○宋哲宗立復章惇蔡卞官惇入相遂引其黨蔡卞林希黃履來之邵張商英周秩翟思上官均等居要地任言責協謀朋姦報復仇怨追貶元祐宰執呂公著司馬光等安置呂大防范純仁等三十人正合此爻

六五帝乙歸妹以祉元吉

如成王之於周公商高宗之於傳說劉先主之於孔明  
唐太宗之於房玄齡杜如晦魏徵是也

上六城復于隍勿用師自邑告命貞吝

周室東遷號令不行於天下其後爲東周君獨守河南  
二邑卽此爻之義也○九三之時尙可爲也故能艱貞

則无咎上六之時不可爲也雖自邑告命而不免於吝此所以貴制治於未亂保邦於未危也歟

三三

坤下  
乾上

否之匪人不利君子貞大往小來

初六拔茅茹以其彙貞吉亨

漢成帝時王鳳王商王立王根王音並進用事乘時奢靡王莽獨恭儉謹勅收聘賢良斯時惡未形也所行有似於貞但其志不在君故終不能變爲君子耳○唐張昌宗誣陷魏元忠引張說爲證說許之後聽宋璟劉知義之戒說於太后前言昌宗逼臣使誣證之耳元忠得

不死是小人而變爲君子也

六二包承小人吉大人否亨

王莽得政以大司徒孔光名儒相三主太后所敬於是盛尊事光此包承也但光不能否亨不足以爲大人耳嚴尤荀彧之徒亦然○如陽貨欲見孔子先來加禮孔子時其亡而往拜之雖相遇而不親終不亂於小人之羣是大人否亨也○王莽遣使者奉璽書印綬迎龔勝勝不食而死莽以安車迎薛方方嬖辭不至亦可謂不亂羣者矣

六三包羞

如小人有勢位而短於才欲害君子而未能也漢元帝時史高外屬尊重與蕭望之有隙宦官弘恭石顯詐致望之下獄上責恭顯二人因使史高言於上免望之爲庶人彷彿此爻之象

九四有命无咎疇離祉

如漢宣帝擢用朱邑龔遂蕭望之尹翁歸黃霸諸賢臣是也武帝之世漢之否也至是將濟矣諸臣无咎離祉也如趙廣漢蓋寬饒韓延壽楊惲之見殺亦以陽居陰不極其剛之義有未盡歟○周宣王中興之佐如尹吉甫方叔召穆公仲山甫是无咎離祉也

九五休否大人吉其亡其亡繫于苞桑

周宣王承厲王之亂用諸賢佐撥亂修政法文武成康之遺制海內翕然向風諸侯復宗此休否也遇災而懼則曰周餘黎民靡有孑遺大命近止靡瞻靡顧此其亡其亡也卒成中興之業是繫于苞桑也

上九傾否先否後喜

如有夏昏德民墜塗炭湯代虐以寬兆民允懷紂毒痛四海罪浮于桀武王伐之天下大定漢光武之中興皆傾否者也

三三

離下  
乾上

同人于野亨利涉大川利君子貞

初九同人于門无咎

君子尊賢而容衆嘉善而矜不能周而不比羣而不黨是也○無內外無爾我親疏厚薄隨其分而處之猶出門同人而無家人偏暱之私也

六二同人于宗吝

不能大同而繫於私則有阿黨之吝如事君者將順而少匡正盡瘁而不薦賢交友者可則與不可則拒治民者驩虞小惠不能及遠是也

九三伏戎于莽升其高陵三歲不興



凡圖非已有者皆徒勞而无功此爻之義也○春秋書公次于滑欲救紀而不能以齊強故也

九四乘其墉弗克攻吉

春秋趙宣子納捷菑於邾邾人辭之以義宣子引師而去之先儒引此爻之義以美之蓋聞義能改誠人情之所難也○同人三四皆爭奪六二一陰爻以人事言則婚姻爲最切古人於與國用力以求必得如晉楚爭陳鄭之類又如齊桓之得管仲當時亦用許多計數恐不得之於魯

九五同人先號咷而後笑大師克相遇

如周公遭管蔡武庚流言遜位東居成王感悟迎公以歸而誅武庚管蔡是也○凡心同而爲小人所閒必去其閒者而後得合君臣朋友親戚皆然○此爻當與屯六二參看

上九同人于郊无悔

无事任无交與人不與之同靜而無動故雖無同亦無悔○胡氏云如荷蕢之徒然荷蕢本不欲與人同與此爻異

䷌

乾下  
離上

大有元亨

初九无交害匪咎艱則无咎

生當盛世民物豐富易有驕盈之失惟初剛正位卑寡  
交事淺浮侈之心未作勤儉之心未變故无害猶必艱  
以處之則終无咎蓋危者使平易者使傾易之道也○  
如漢光武徵處士王良用之良在位恭儉布被瓦器妻  
子不入官舍後病歸復徵不應是此爻之象如嚴光周  
黨未嘗受祿與此稍異

九二大車以載有攸往无咎

才德茂而得君之委任古之可以當此爻者伊傅周召  
其人也

九三公用亨于天子小人弗克

亨于天子有被遇親接之意非常朝也天子優禮勳勞如天王賜胙於齊桓晉文者然由是諸侯以玉帛方物朝獻於天子以致尊君敬上之心若小人无君上之禮遇則无由朝獻於天子也○九二宰相任重之事九三諸侯朝獻之事

九四匪其彭无咎

伊尹之於太甲周公之於成王霍光之於漢昭帝郭子儀之於唐代宗此爻是也臣罔以寵利居成功伊尹之匪彭也公孫碩膚赤舄几几周公之匪彭也出入朝堂

小心謹慎郎僕射竊識視之不失尺寸霍光之匪彭也  
功蓋天下而主不疑位極人臣而衆不嫉郭子儀之匪  
彭也

六五厥孚交如威如吉

漢文帝寬仁恭儉將相多舊功臣至於殺薄昭伸國法  
則奮然剛斷是威如也○宋仁宗恭儉仁恕信任韓琦  
富弼呂夷簡范仲淹等是厥孚交如但仁柔有餘而剛  
武不足是以常有裔翟之禍不能如漢唐之盛也○時  
當大有豐樂易生故明罰勅法董正治官詰爾戎兵皆  
威如之道不可不講也

上九自天祐之吉无不利

如堯之從舜舜之從禹湯之於伊尹昭烈之於孔明皆履信思順而尙賢故天祐而吉也

䷁

艮下  
坤上

謙亨君子有終

初六謙謙君子用涉大川吉

顏子願無伐善無施勞以能問於不能以多問於寡有若無實若虛是謙謙君子也○謙謙之道雖用以濟險亦吉況平居乎

六二鳴謙貞吉

如孔子德愈盛而心愈下其謙已誨人具見論語而周流所至以溫良恭儉讓得聞國政也

九三勞謙君子有終吉

周公身當大任上奉幼主夔夔恭畏吐哺下賢禹成允成功不自滿假惟不矜天下莫與爭功能惟不伐天下莫與爭功是勞謙有終也唐之郭子儀亦是若孟之反不伐是勞謙之一端也

六四无不利撝謙

若藺相如之讓廉頗寇恂之屈賈復彷彿此爻之義○唐宰相盧懷慎清謹儉素自以其才不及姚崇每事推

崇亦撝謙之意也○漢光武以竇融爲大司空融自以非舊臣一旦入朝在功臣之右每召會進見容貌辭氣卑恭已甚帝愈親厚之

六五不富以其鄰利用侵伐无不利

若舜之征有苗文王之伐密伐崇是也如漢文帝屈於匈奴與之和親是一於柔不用侵伐不能以威武濟其謙柔也

上六鳴謙利用行師征邑國

謙極得人心雖行師亦利他事可知矣○此卦下三爻皆吉而無凶上三爻皆利而無害謙之效如此可不務



哉

䷁

坤下  
震上

豫利建侯行師

初六鳴豫凶

如唐順宗時王伾王叔文用事韓泰柳宗元劉禹錫等  
采聽謀議汲汲如狂互相推獎憫然自得以爲伊周管  
葛復出是鳴豫也

六二介于石不終日貞吉

漢宣帝時疏廣疏受爲太子傅知太子柔弱不去懼有  
後悔卽上疏乞骸骨去是二疏見幾而作不俟終日也

○漢穆生以醴酒不設而去楚曰不去楚人將黔我於市晉張翰顧榮見晉室將亂或託思葦鱸而歸故鄉或率妻子先逃於林慮山中甚者如唐楊元琰請爲僧以免武三思之害漢金日磾不肯納女後宮不肯受秬侯之封以全其宗勝於霍光遠矣此皆介于石不終日而見凡事之幾微也

六三盱豫悔遲有悔

漢章帝時竇憲專權強橫班固趨其權寵利其富貴爲之典文章憲被誅班固以竇氏賓客收捕死獄中此盱豫有悔也

九四由豫大有得勿疑朋盍簪

天子之豫由己致之如伊尹周公其人也然伊尹必敷求哲人周公必吐哺求賢也如諸葛孔明相蜀開誠心布公道集衆思廣忠益合於此爻之義

六五貞疾恒不死

如衰周之君受制於大國威令不行下堂而見諸侯是貞疾也然未有大失人心之事而得僅保其位此恒不死也又如漢魏末世之主唐肅代以後諸帝皆受制於下而僅存位號者也

上六冥豫成有渝无咎

昏冥於豫宜有咎矣若能改過遷善則无咎如楚莊王  
聽伍舉之諫而罷淫樂國以益強齊威王因淳于髡之  
諷而行誅賞齊遂大治是也漢武晚年輪臺之詔亦然

三三

震下  
兌上

隨元亨利貞无咎

初九官有渝貞吉出門交有功

友直友諒友多聞益矣是貞吉也樂多賢友益矣是出  
門交有功也○如居是邦也事其大夫之賢者友其士  
之仁者友一鄉之善士以至一國天下之善士此交之  
義也

六二係小子失丈夫

如管叔以武庚叛揚雄爲莽大失是也○女之從夫臣之從君弟子之從師士之交友皆有此爻之象如見小利則大事不成或小不忍而亂大謀或貪近功而忘遠圖之類亦是也

六三係丈夫失小子隨有求得利居貞

如王陵以兵屬漢而項羽執其母以招之不就韓信去項羽因蕭何而得拜大將於漢是也○凡昏之從明事之從善皆是

九四隨有獲貞凶有孚在道以明何咎

此爻伊尹周公孔明是也○唐郭子儀當強賊未平則慷慨流涕或單騎見虜以紓國難是有孚也握重兵於外又有百戰之功朝廷所以處之屢失其宜而無纖芥顧望之意朝聞命夕啓行是在道也故權傾天下而朝不忌功蓋一世而上不疑真萬世人臣之法也○蕭何最能善處功名以消上心之疑貳韓信挾功求賞能無凶乎霍氏之禍起於驂乘不能有孚在道也

九五孚于嘉吉

如堯舜禹湯文武之於五臣十亂伊傅輩知之深任之專而無毫髮之疑也後世如漢光武之於鄧賈唐太宗

之於房杜亦皆孚于嘉者也

上六拘係之乃從維之王用亨于西山

如七十子之服孔子雖畏於匡阨於陳蔡而不去舅犯  
趙衰等從重耳出亡備歷艱苦而不離五百從田橫於  
海島而無叛色荆楚之士從劉備於江南而依依如雲  
皆隨之固結者也○程傳曰太王去豳遷岐豳人從之  
如歸市隨之固結如此故王業用此亨盛於岐山也此  
與誠意之極可通神明不同



巽下  
艮上

盡元亨利涉大川先甲三日後甲三日

初六幹父之蠱有子考无咎厲終吉

如漢宣帝勵精爲治漢業中興唐憲宗伐叛討逆威令復張是蠱未深而能幹者也

九二幹母之蠱不可貞

世固有父喪而母任家事者又或家事之敗出於婦人亂政而其才子能飭之爲幹母之蠱又凡以柔居尊性暗而難開者皆有母蠱之意幹之者不可堅固盡其剛直之道如周公之於成王孔明之於後主是也○朱司馬公入相盡變熙寧之法可謂善矣亦有不必要變者如僱役之類是未得中也



九三幹父之蠱小有悔无大咎

蠱非剛不能幹然過剛不中未免有拂戾之嫌如宋元祐閒汪觀孫覺劉摯等欲盡去小人疾惡太甚而小人陰圖報復未免有悔若元祐諸賢有以善道而巽入之則其毒將不至於後來之甚也

六四裕父之蠱往見吝

如周平王東遷號令不行宋高宗南渡偷安忍恥其後勢日微弱此裕蠱往吝者也


六五幹父之蠱用譽

如商高宗用甘盤傳說祖己而商道復興周宣王用尹

吉甫仲山甫召虎方叔而周以中興是也程傳以太甲成王蒙引以宋仁宗實此爻雖於用賢致譽有合然非幹父之蠱者也

上九不事王侯高尙其事

有才德而不當事任如伊尹太公之初顏曾子思之徒是也若不事王侯又不高尙吾身之德義徒潔身亂倫索隱行怪未免於過也其志豈可則乎



兌下  
坤上

臨元亨利貞至于八月有凶

初九咸臨貞吉

宋元祐初汪覲孫覺劉摯蘇轍等論蔡確章惇韓縝呂惠卿等之罪俱免官惠卿貶竄是陽進凌陰也

九二咸臨吉无不利

如舜攝位而流共工放驩兜竄三苗殛鯀以四凶未順命故咸臨以去之

六三甘臨无攸利既憂之无咎

唐武后嘗命朝貴宴集張易之兄弟位在宋璟上易之素憚璟欲悅其意虛位揖之曰公方今第一人何乃下坐此甘臨也然不能憂而改行從善終不免廡下之誅也

六四至臨无咎


二人同心其利斷金同心之言其臭如蘭情意懇篤相臨至切者也友道得矣故无咎○又如居近君之位柔順得正而下賢切至周公是也○四至臨爲相之折節下賢五知臨爲君之知人善任

六五知臨大君之宜吉

如帝舜能用禹臯陶而臨下以簡謂之大知也

上六敦臨吉无咎

敦臨者篤於其終如晏平仲善與人交久而敬之是也又敦思無窮容保民无疆亦敦臨之義也



坤下  
巽上

觀盥而不薦有孚顒若

初六童觀小人无咎君子吝

兒童識見昏淺不能識君子之道者如細民身居草野不能遠見乃其常分有位者以天下國家爲事而如是則可羞也○童觀是茫然無所見百姓日用而不知者也闕觀是所見者小而不見全體中人以下之事也六二闕觀利女貞

獨居一室不知天下之事或遙度事宜實无燭見之明者是闕觀也○士君子亦須遠歷四方以廣其聞見如

孔子自謂東西南北之人者是也又如司馬子長邵堯夫蘇子由皆求盡天地之大觀而不屑爲闕觀之女貞者也

六三觀我生進退

天民達可行於天下而後行之是觀我生而進也子使漆雕開仕對曰吾斯之未能信是觀我生而不進也不進則退也○漢高欲興禮樂魯兩生不肯行知漢高不足與興禮樂也劉先主欲復漢室諸葛孔明從之知先主可與有爲也范增不知項羽之不足與有爲而從之以取天下楊龜山不知蔡京之不足與有爲而欲維持

天下事可謂不善審於進退而失此爻之義矣

六四觀國之光利用賓于王

明聖在上而懷才抱德之士得近其光華輔君施澤如諸侯入爲天子公卿賢士出而任職左右也○舜之徵庸尹之膺聘說之爰立是觀光用賓也

九五觀我生君子无咎

九五中正以觀天下如堯舜禹湯文武之君也占者若合於君子之道則足以觀示天下而无咎矣

上九觀其生君子无咎

不當事任如賓師之位孟子去齊齊王欲畱之使諸大

夫國人皆有所矜式是以君子之德爲下所觀也○賢人君子不在於位而道德爲天下所觀占者苟未君子則何使人觀仰矜式是其咎也

三三

震下  
離上

噬嗑亨利用獄

初九履校滅趾无咎

小懲大誡止惡於初則不貽惡積罪大之凶禍矣故曰  
刑期無刑辟以止辟若不懲之於初俟其惡深而後治  
之所傷雖大而終難盡革凡教人治人者不可不知此  
義○如漢文帝時淮南王長入朝以怨擊殺辟陽侯侯審



食其帝不之罪後歸國益驕橫及謀反廢處蜀郡憤恚  
不食死失此父之義矣

六二噬膚滅鼻无咎

以中正治獄何難之有但己本柔弱所治強梗之徒有  
不服未免少損其威然能善治終无咎也

六三噬腊肉遇毒小吝无咎

今之斷訟人不輸服而反致告訐者是遇毒也我方治  
彼而彼反傷我固爲小吝然彼本有罪在我自當治之  
而不爲過始雖頑梗終必輸服故无咎○漢蕭望之使  
御史案韓延壽放散官錢舊事延壽亦案校望之前事

宣帝各令窮考望之卒無事實而延壽奢僭逾制竟坐棄市彷彿此爻之義

九四噬乾肺得金矢利艱貞吉

強梗難治之徒而亦得其輸服如召伯聽雀角鼠牙之訟而貞女得以自明唐唐臨所處之囚見高宗自謂無冤是也○漢于定國爲廷尉決疑平法務在哀鰥寡罪疑從輕加審慎之心是艱貞也

六五噬乾肉得黃金貞厲无咎

如舜之四罪而天下咸服避位而訟獄皆歸惟明克允欽恤好生是也

上九何校滅耳凶

怙終不悛故惡積而不可掩罪大而不可解何凶如之  
故人不可不審聽而早圖也○古今人小過不改馴至  
大惡而殺其身者比比然也○唐元載弄權舞智政以  
賄成僭侈無度代宗戒之不悛會有告載謀爲不軌者  
上命收載賜自盡

三三

離下  
艮上

賁亨小利有攸往

初九賁其趾舍車而徒

守節處義而安於貧賤如孔子所謂不義而富且貴於

我如浮雲孟子所謂飽乎仁義所以不顧人之膏粱之味令聞廣譽施於身所以不顧人之文繡也○古之恬退者自謂安步以當車晚食以當肉無罪以當貴其賁耻舍車之義歟

### 六二賁其須

以柔附剛中正相與如漢陳平惠諸呂力不能制用陸賈言交驩周勃兩人深相結呂氏謀益衰後竟誅呂安劉又如唐盧懷慎與姚崇同爲相自以才不及崇每事推之時人謂之伴食宰相皆有賁須之象

### 九三賁如濡如永貞吉

晉重耳出奔至齊安於齊姜而忘四方之志可謂溺於所安矣不有齊姜子犯醉遣之謀安有霸晉之事然後知二陰果足以溺人聖人永貞之戒信不誣也○凡丈夫之於妻妾人君之於臣下官長之於左右皆不可溺於所安而自失其守以致爲彼所陵也蓋近之則不遜不可不戒

六四賁如皤如白馬翰如匪寇婚媾

如關羽本劉備之臣不幸爲曹操所得猶四與初相賁而爲三所隔也羽終無畱意所謂白馬翰如然操非欲害羽乃欲用之所謂匪寇婚媾也

六五賁于丘園束帛莢莢吝終吉

不貴文而貴質卽林放問禮之本之意也晏子一狐裘三十年豚肩不掩豆其束帛莢莢者歟○敦本尙實如幽風七月之詩諄諄於農桑無逸之書欲人君知稼穡之艱難漢文帝之恭儉重農武帝下輪臺之詔是也

上九白賁无咎

承文勝之弊而返之以就於質卽夫子寧儉寧戚之說白賁之義也○孔子筮得賁而愀然不樂曰吾聞丹漆不文白玉不雕寶珠不飾質有餘者不受飾也亦此爻之義乎○老聃爲周柱下史習於禮者故夫子從而問

焉後一掃去繁文而事清淨亦近此

䷁ 坤下  
艮上

剝不利有攸往

初六剝牀以足蔑貞凶

宋神宗以王安石爲參知政事變法立司呂誨上疏言  
大姦得路羣陰彙進則賢者盡去亂由是生誤天下蒼  
生必此人也誨遂見黜此爻之義也

六二剝牀以辨蔑貞凶

王安石變法薦用呂惠卿陳升之曾布韓絳鄧綰諸附  
己者爲執政黜貶呂公弼劉摯范純仁呂公著蘇轍劉

摯富弼韓琦趙抃張方平諸不附己者其剝漸進矣

### 六三剝之无咎

漢靈帝時宦官曹節王甫等誣陷李膺杜密范滂諸賢爲鉤黨死徙廢禁者數百人中常侍呂強因張角之亂勸帝盡赦黨人還諸徙者是衆方剝陽而呂強獨應之也

### 六四剝牀以膚凶

如曹節王甫殺竇武陳蕃遂遷竇太后於南宮於是羣小得志士大夫皆喪氣是也凡小人黨盛而殘害忠良劫制君上皆此爻之象



六五貫魚以宮人寵无不利

如武后革唐爲周獨信重狄仁傑嘗謂之國老而不名仁傑好面引廷爭武后每屈意從之彷彿有衆陰之長率其類受制於陽之意

上九碩果不食君子得輿小人剝廬

如武后革唐舉朝皆武氏之臣獨狄仁傑以一身殉唐薦用張柬之桓彥範敬暉等率復唐祚是碩果復生之象也○戰國時人尙富強變詐惟孟子守聖道明仁義以見知自任而啓後世之聞知孟子其衰周之碩果乎○亂極自當治陽與君子之道不可亡也故發碩果之

義

䷲ 震下  
䷁ 坤上

復亨出入无疾朋來无咎反復其道此曰來復利有攸往  
初九不遠復无祇悔元吉

顏子有不善未嘗不知知之未嘗復行此克己復禮之  
功切至也故夫子以此交贊之○以道統既絕而復續  
言則朱周子開其先復之初九也而程朱大儒繼出是  
朋來之休復者歟

六二休復吉

子貢問爲仁子曰事其大夫之賢者友其士之仁者子

賤能尊賢取友以成君子之德此交是也

### 六三頻復厲无咎

如不善之人性又躁動故復善不固如漢元帝知蕭望之之賢而爲宦官詐致於獄旣而知之責恭顯矣又信史高之言免望之爲庶人後復倚任望之又爲恭顯誣奏請召致廷尉上曰蕭太傅素剛安肯就吏顯等言必無所憂上乃可其奏望之自殺上切責恭顯二人叩頭謝罪竟不之究此頻復之象也

### 六四中行獨復

如寺人披之事君漢鄭衆之辭賞呂強之直諫唐馬存

亮之弭亂張承業之竭忠皆宦官之陰類而獨能從陽剛之善道也

六五敦復无悔

如太甲成王悔過遷善卒爲商周之令主是能敦復者也

上六迷復凶有災眚用行師終有大敗以其國君凶至于十年不克征

如桀紂秦二世隋煬帝之類是也

䷀

震下  
乾上

无妄元亨利貞其匪正有眚不利有攸往

初九无妄往吉

无妄誠也至誠未有不動者如是而往以上則得君以下則得民以內則順親以外則信友事無不立功無不成矣○凡聖賢所爲皆以无妄而往者也

六二不耕穫不菑畲則利有攸往

因時順理盡吾分之所當爲而始終无營求計較之私心故雖不謀利而自有其利不計功而功無不成如聖人無爲而治學者不要人爵而人爵從之是也

六三无妄之災或繫之牛行人之得邑人之災

如孔子貌似陽虎被圍於匡是也○此與楚國亡猿而

禍延林木城門失火而殃及池魚者正相類

九四可貞无咎

乾剛可以有爲下無應與僅可自守如陶淵明志欲爲孔明奈無一旅之衆故終於處士謝疊山亦欲爲朱程嬰然卒無所藉手而志於賣卜也

九五无妄之疾勿藥有喜

如文王美里之囚周公流言之變是无妄之疾文王不殄厥愠亦不隕厥問周公公孫碩膚德音不瑕皆勿藥而自愈也○舜之有苗孔子之叔孫武叔亦无妄之疾也○凡我所處本自當理无可虞者乃爲人所疑沮自

惑而遷之則失是取非反足以招咎是試无妄之藥也  
然未能无妄而致疾又未可忘自反之功也○如匡人  
圍孔子孔子與弟子援琴而歌匡人知非陽虎也遂解  
去合此爻之義

上九无妄行有眚无攸利

處時之極必信必果膠固不通如尾生孝已之行窮而  
不知變者也

䷀

乾下  
艮上

大畜利貞不家食吉利涉大川

初九有厲利已

漢申屠蟠見幾而作獨免黨錮之禍後又不屈於董卓  
異於苟爽諸人矣是此爻之象○朱邵堯夫當王安石  
變法之時人屢薦之不起後補潁州團練推官稱疾不  
行

九二輿說輶

凡昏主姦臣在上而賢人君子安於貧賤不輕仕進者  
如顏曾閔冉之類是也○朱劉勉之以時禁伊洛之學  
力耕自給澹然无求於世朱子從之學焉

九三良馬逐利艱貞曰閑輿衛利有攸往

如宋元祐時以程正叔爲崇政殿說書司馬光呂公著



薦之故也○元祐閒諸賢並進伸於羣姦所畜之後是  
良馬逐也乃興私忿小怨自分黨與互相攻擊於艱貞  
曰閑之道猶有未至者歟

六四童牛之牯元吉

止惡於初微而易制所謂禁於未發之謂豫也如唐太  
宗論止盜以去奢省費輕徭薄賦選用廉吏使民衣食  
有餘則自不爲盜安用重法耶得此義矣○蘇氏曰止  
亂以義止盜以義使人皆知父子君臣之義誰與爲亂  
哉○如上兵伐謀不戰而屈人之兵亦此義也

六五豮豕之牙吉

如止盜不尙威刑而修政教使之有農桑之業知廉恥之道則得其要而盜止矣○銷亡大盜之術莫大於籠取天下之豪傑豪傑旣爲我籠取則彼卒材鼠輩雖多不足憂矣此得獷豕之義者也○豕牙本能傷物旣積則其牙不爲害矣如魏已伐韓齊師直走魏都而韓師自解得要害也項羽以范增爲謀主陳平以計聞之增死而項勢益蹙壞其心腹也

上九何天之衢亨

呂尙屠於市而不利入見棄於室人韓信寄食於漂母受辱於胯下畜之極矣呂尙遇文武伐紂而成王業韓

信遇漢高誅秦蹙項以定天下所謂何天之衢也然大  
學補傳所謂用力之久一旦豁然貫通者亦是此意多  
識前言往行以畜其德者以之可也



震下  
艮上

頤貞吉觀頤自求口實

初九舍爾靈龜觀我朵頤凶

以陽從陰迷欲而失節如東漢之華歆是也又樂正子  
從子敖之齊孟子斥其徒餉啜亦此爻之象

六二頤頤拂經于丘頤征凶

如柔弱無能者求養於卑賤之人非常理矣欲求養於

有權位之人而非其親故彼必不與而反致困辱也○  
春秋書天王使家父來求車毛伯來求金武氏子來求  
賄此以上求下正顛頤拂經之義也

六三拂頤貞凶十年勿用无攸利

此徇利而忘義縱欲以傷生者如太康以逸豫失天下  
商紂以淫酗取滅亡之類皆拂頤而凶也

六四顛頤吉虎視眈眈其欲逐逐无咎

四在人上而才不足以養人乃求在下之賢以共濟其  
求之也專且久可以養人而不窮矣○唐張說喜推薦  
後進善用人之長多引天下知名士以佐佑王化○漢

胡廣歷任三公所辟多天下名士練達故事明解朝章  
亦求賢共濟之象

六五拂經居貞吉不可涉大川

爲君者不能養人而賴師傅太臣之賢者以養人是正  
道也若自用以涉險則不利矣此如太甲之任伊尹成  
王之任周公後主之任孔明是也

上九由頤厲吉利涉大川

如伊尹周公孔明之輔君養民兢兢業業思慮詳審處  
置得宜而能濟天下之難也

䷧

巽下  
兌上

大過棟橈利有攸往亨

初六藉用白茅无咎

如彭祖觀井先以輪蓋井上又以繩繫身而繫於木然後觀之過於畏慎者也○凡聖賢兢兢業業戒謹恐懼思患預防謀出萬全皆此道也

九二枯楊生稊老夫得其女妻无不利

剛稍過而得柔以濟之如家主治家太剛而內人時導之以寬厚長官用法太嚴而佐貳輔之以寬厚則下無怨矣又如老父之得才子足以幹家之蠱庸君之得賢臣有以振國之衰餘可類推

九三棟撓凶

如剛愎自用者然太剛則折宋王安石似之

九四棟隆吉有它吝


大臣剛能用柔克勝重任者也若更繫於在下之柔太柔則廢矣○如唐郭子儀棟之隆者杜鴻漸之於崔旰有它吝者也

九五枯楊生華老婦得其士夫无咎无譽

在我過剛失當而所比又過柔委靡如君既躁而臣又暗父既老而子又弱不足以有爲也

上六過涉滅頂凶无咎

此爻宋文天祥陸秀夫張世傑可以當之



坎下  
坎上

習坎有孚維心亨行有尙

初六習坎入于坎窞凶

如新莽時將軍甄豐國師劉秀前後皆自殺是習坎入  
坎者也又凡柔暗無才之人在事勢危險之地鮮有不  
終身憂辱以陷於死亡者矣

九二坎有險求小得

漢成帝時劉向極憂王氏擅權之禍遂上封事天子召  
見歎息然終不能用是在險小得之象



六三來之坎坎險且枕入于坎窞勿用

詩云進退維谷又云其何能淑載胥及溺此爻是也○如燕將保聊城懼讒不敢歸田單攻聊城不下使魯仲連遺燕將書勸之歸燕或降齊燕將欲歸恐見誅欲降齊恐已降而後見辱遂自刃

六四樽酒簋二用缶納約自牖終无咎

大臣當艱阻之時不可以直遂惟盡忠誠委曲以求遇如趙太后不肯以長安君爲質於齊大臣強諫不聽左師觸讐以愛子當使之有功以長久富貴婉導之而長安君出質如漢高祖欲易太子周昌叔孫通切諫不從

張良以四皓帝所不能致乃招四皓隨太子入朝帝見怪問謂太子羽翼已成不可動搖遂不復易此因其所明而通之納約自牖之義也

九五坎不盈祇既平无咎

如漢光武初年尙有隗囂公孫述盧芳諸僭國是坎不盈也十三年以後祇既平矣

上六係用徽繼寘于叢棘三歲不得凶

如千乘之國攝乎大國之間加之以師旅因之以飢饉而又有內變發乎蕭牆之內尙能國乎又周赧王漢獻帝之類亦其象也

三三

離下  
離上

離利貞亨畜牝牛吉

初九履錯然敬之无咎

漢文帝欲以賈誼任公卿大臣短之曰年少初學專欲擅權紛亂諸事上於是疏之不用其議○子張學干祿是履錯夫子教之慎言行寡尤悔是敬之无咎也

六二黃離元吉

柔麗乎中正蓋所親附之人所由之道所主之事皆得正也如所立者必天下之正位所行者必天下之大道必事其大夫之賢者必友其士之仁者此類是也○以

臣道言禹臯伊傅周召其人也

九三日昃之離不鼓缶而歌則大耋之嗟凶

盛必有衰始必有終常道也安常自樂則无用嗟矣所謂樂天知命故不憂所謂居易以俟命殀壽不貳修身以俟之皆鼓缶而歌之義也○程傳曰此處死生之道也然盛衰得失循環之理處之皆如是

九四突如其來如焚如死如棄如

凡繼人任事之初須和緩詳密巽讓順承若舜啓然乃克有濟若過於剛急遽更張不以其漸則激變生災而至於自焚矣如秦政項籍豈能久也秦政一夷大國遂

埽滅百王之法項籍遂殺子嬰裂天下以封諸侯獨爲霸王何暴哉

六五出涕沱若戚嗟若吉

如人主存心善而處事不當左右又皆權臣若能憂懼庶可保其位也漢宣帝初年似之

上九王用出征有嘉折首獲匪其醜无咎

如湯武之師誅其君而弔其民及所謂殲厥渠魁脅從罔治舊染汙俗咸與惟新也

周易本義文徵卷上終